

續
學
堂
詩
鈔

序

於舉世數百年所莫爲之學爲之而其端至微至
密其事至實不可以豪釐差不可以意匠營度而
獨孜孜焉自少至老竭智慮以窮其術而非有所
慕利於其間斯其志趣若逃空虛者之乎廣莫遊
寥廓者極於青冥其視世之咕畢歌吟以弋瑣瑣
之名者豈直蛙聲蚓竅而已哉宜無復有所置意
今夫天地古今之所以爲天地古今者氣與數而
已數肇於氣而卽以定氣故數也者古帝王以之

明天察地紀物蹟而覈事變三代之實學在是後
漫失傳流海外爲西人得轉以蹠蹠乎中國可歎
也余昔年入京師聞宣城梅先生精數學以安溪
相國薦

聖祖仁皇帝召見蒙殊寵然未聞以詩鳴也今先
生之孫御史大夫循齋先生以先生所著勿庵詩
集見示屬余擇其尤以壽諸梓且命題其後余伏
而讀之矍然起曰此固先生之餘事也何乃復進
於古若爾耶昔之論詩者曰有詩人之詩有才人

之詩有學人之詩余謂才人以氣雄學人以材富
詩人以韻格標勝然律以古之作詩者則皆無是
也古之作詩者要唯言其所不得已與言其所自
得而已非是二者詩不作可也若先生之詩則言
其所自得矣雅其自得故絕無規撫之迹而自進
於古其才氣格韻雖鞏白無以加以是知善詩者
不徒求之詩也蓋先生之學幾于道矣窺秘于圖
書溯源于黃帝堯舜參稽于四時日月星辰極變
于方圓高下斯其神之所凝心之所遊翛然于塵

垢之外居寂寞而玩高明適其趣者山水寫其樂者兄弟友朋以是而爲詩詩心聲也宜若幽谿邃壑之泉瀉之萬仞而上其清也若空其甘也若醴其奏也如金玉之鏘而挾之以天籟乎余讀先生詩集更念先生之治數學也不足以炫世世亦莫問告焉而莫喻者而當所與往來酬酢者猶有穆尼閣方素北方位白陳獻可章穎叔李安卿薛儀甫諸人同聲相應于千里之外斯亦奇矣何至今日而遂寂寂耶以是歎前賢之用心負乎遠矣此

余讀先生之集而更爲之畢然耳時

乾隆歲次壬申三月婁東後學沈起元撰

原序

吾宛陵梅氏自聖俞先生以來世以詩名往敘述
之衆矣最後得梅子定九詩定九有志於君子之
道日之爲詩人則瞿然謝不敏余蓋心異之夫日
月星辰天之文也山川艸木地之文也天官五行
曆律度数則所以經緯天地而妙其推測者也吾
處天地之間俯仰上下心迷目眩漫無闕度比於
蠻蟲寒鳥徒自號曰文人詩人也亦奚益哉定九
砥礪學行探本知類於象緯歷算之學殆由性成

數計心通能自制器以準象間取西洋之學發揮
討論南中言西學者數家質疑送難皆歎遲以爲
莫及嘗手列其所見曆學諸書凡數十種多人所
未見猶欲廣搜秘本以資參互屬余網羅可謂好
學深思者也昔房玄齡等重撰晉書天文曆律五
行三志專屬李淳風爲能深明星曆故可觀采今
國家方纂修明史使得定九參與其中修天文
曆律諸志卽未知視淳風何若當有可觀惜乎其
不獲與也平生旣罕徵逐中年早鰥遂不復娶日

夜枕籍詩書以自娛暢其溢而爲文振筆風發技藝則冠其曹又溢而爲詩清真靜遠稱心爲言無時人餽衒裘馬之習易傳有之君子以言有物而行有恆夫詩不足以盡定九而其詩已卓犖有出於人是可以知定九矣

康熙己未陽月中浣同里弟施閏章拜撰

原序

江以南家世稱詩庶幾人人有集宜莫先余梅氏
矣余蚤孤趨庭無所承誨然少嘗致力於是長而
行四方與學士大夫相劇切卽未敢謂有當於古
人抑且鬱鬱然不肯苟同於俗下從叔定九嘗謂
余曰通三才爲儒極子之才毋徒流連光景比切
聲律已也顧余性簡脫於儒先之書未能覃精力
索以通其意或授以陰陽算數初不甚了亦旋復
失之定九博覽多通少善舉子文戊午鄉試於南

中得泰西曆象書盈尺窮日夜不舍旦日且入關
余篋而置諸它所則艱然曰余不卒業是書中忤
忤若有所亡文於何有余笑而還之嘗言西法詳
密實勝授時諸曆又自爲書以折衷其所未盡而
手製測晷妙逾西器其冥悟類夙授也比多客遊
則又時時爲詩大率意有所獨造而旁暢於文詞
非塗澤以爲觀者如龔金長真臬憲寄青州薛儀
甫送章穎叔還山陰諸作言之灑然余固無與於
象數之學者讀其詩亦時窺其彷彿其他清真靜

遠稱心爲言施侍讀愚山嘗亟稱之而嘉禾曹侍
郎推爲有本之學則以其神明內蘊詩固不足以
盡之也先太中用詩學起家厥後名輩相承蔭映
江左逮我先公懷文抱質而盛業未究余季父將
欲裒爲家風集源自有宋訖於明季頃從祖瞿山
亦有事於梅氏詩畧蒐採畧備固以屬定九及余
助成之逡巡謝未遑也嗚呼浮華競而實學衰定
九疇昔之言固將刊華就實以刷文人之恥余寧
不謂然然而家風未屬名德無聞庸非吾黨之責

乎因敘而及之述魏也

同學姪庚拜撰

原序

有本之學其積也不易專一以入之博涉以辨之
持久以畜之然後羣美畢瀕瀕出而爲詩則其氣
厚志完無體不備上足追配昔賢而下以度越餘
子非粹然之効也淺夫執詩論詩講求縱極工曾
不出聲律章句之外殆類刻楮搏沙用力多矣歸
於糜散無所成而止不工者更何論焉余持此相
天下詩誦其迂者不啻戕手而起余終不變其說
意宇宙大矣必有足當之者俾見之梅子定九定

九深於律歷著書至數十種四方稱之獨未有知其善詩者夫萬物本於天難測亦莫如天以天爲之宗則神明所相理數舉萃於一源他藝能均不勞而自致定九不以自足窮探廣索晝緝夜思劬古人一物不知以爲己貴將經術經世靡不本躬修以驗諸行事而況於詩乎癸亥之春告余藥其藥入燕燕多詩人其引爲同調連日夕倡和尚未可知而明史脫藥有期矣天文五行志專家豈必能多一聞定九至有不薦之於朝使參預其事

成一代不刊盛典者乎恐從此定九得行其學不復能多作詩如在江南時矣余於觀天之道惛然無所窺徒取其詩序之以志推服之久若世之知定九不能先於余然必有重其學因重其詩者則其不迂余之論也有日矣

檇李弟曹 溶拜撰

目錄

卷首

序

目錄

卷一

己酉至戊午共詩七十八首

卷二

己未至乙丑共詩一百六首

卷三

丙寅至丙子

丁丑詩缺

共詩八十一首

卷四

戊寅至辛丑共詩一百三首

右續學堂詩鈔四卷先大父徵君公之所作也先徵君著述等身雅不欲以詩名世而生平所存已不下二千餘首沈光祿子大以爲先生名德傾學千古傳人昔揚子雲猶以詞章爲雕蟲篆刻晚年深悔其所爲先生固不肯爲詩人而讀先生之詩者亦宜異於詩人之詩也故集中所登非闕至極而藻采雖工策從姑舍夫然後讀斯集者千百世可以想見其爲人也其目續學堂蓋以我

聖祖仁皇帝有續學參徵賜額云孫穀成敬謹

續學堂詩鈔卷一

宛陵梅文鼎定九甫著

孫穀成循齋用較梓

已酉

雨坐宛津讀友人黃山贈行卷了感而有作
陽坡山前山雨急陵陽山市漁舟入咫尺敬亭看
未能爛醉狂吟思石室有客獨探黃海奇歸來示
我贈行詩勝事仙才兩驚絕愁中使我開雙眉我
聞軒轅有丹井到彼能無發深省大藥何當赤縣
成步虛辭和天都頂

二月二日吳雨若招同沈方鄴魯玉蔡玉及
吳不移家耦長姪集飲街南草堂限仄律
分得集字

斗室臨高城林嵐氣遙集耳無闐闐喧日有圖書
給美酒乍開尊新詩遂盈什相逢同醉歌誰問修
名立

考坑道中

高嶺易爲雲深谷易爲雨還金曾未成何以辟寒
暑腐齒丁壯年况多行役苦引分庶怡情歷境忘

艱阻終當餌黃芽松喬以爲侶
寓目周八荒飄飄
樂輕舉胡爲狃故常棲遲眷倚佐

雪中家從叔瞿山過飲山居

青山閉戶孤居慣書卷時開逸興多
覓句每於閒處得逢君何意雪中過
寒花萬樹看圖畫濁酒盈尊起和歌
泥滑只今愁去馬荒村莫惜醉顏酡

山門歌贈楚山人

山到清明春正好閉門門內生芳草
楚山人忽逐春雲相邀重走山門道
山門石室石崢嶸嶸嶸嶸嶸嶸嶸洞

壑含幽靈酌酒酒盡興不盡披裘恍惚來瞿硎陟
嶺穿巖掃邱墓過此誰能便歸去一步十步重回
頭回頭失却峰頭路爲君歌莫徘徊處處青山雲
一堆君如不厭着山屐石室岩堯盡日開

南崎湖人家寄宿

錯水田間路依山湖上村林嵐風過靜雞犬客來
喧秋漲遙連漢舂船曲到門武陵何處覓今信有
桃源

半山上人七十初度

平公說法心清淨山河大地毫端應揮毫落紙世
爭傳已知光焰垂千年學者只求人目好逢迎意
悴形枯稿不信疾徐甘苦分官止神行進於道吾
觀公年今七十清癯瀟灑金仙質有時扶邛恣遊
賞匡廬泰嶽曾孤往前日黃山風雪中瓢笠歸來
野鶴同如公壽者相已空心空無著壽無窮桑田
海嶽從遷變願公常住依鄉縣長在敬亭宛水間
長爲山川駐好顏

同倪觀湖先生登栢枏山絕頂望仙人臺

峨峨方石臺千尺凌晨烟昔聞山中叟曾此逢飛
僊碁局觀未終倏忽更歲年樵斤置叢條木皮合
且堅崖樹旣摧朽無人能攀緣我來陟嶺半俯視
茲臺顛再尋蛟路登所見唯青天瓊宮到非遠意
欲乘風旋下界溺埃塵安能久遷延庶同五嶽遊
免此情內牽雲車策風馬願言長執鞭

白雲山觀陳孚吉作畫

一名嵩山

白雲山頂扶邛道憶昔扶邛恣幽討人道嵩山似
此奇果是登臨衆山小重來對汝心盤桓欲晴不

晴雲漫漫陳子長歌拂素楮筆峰掃蕩開晴嵐
半青松幾千尺水閣幽人敞虛室我欲呼之同上
最高臺下視浮雲弄白日

寄玉礎王六

有序

玉礎與余妻兄陳三孚吉交三十年無間
兩人皆善畫一以平遠一以馬人物皆擅
名一時居比鄰最久共也嗟乎孚吉先往
不可復作我思玉礎何以爲懷感而寄此

山城新霽增惆悵憶爾虛簷孤嘯時圓就玉驄應

衆賞經營彩筆與誰知郊原木落故如畫溪上雪
消看更奇同坐同行人不見獨逢佳處共君悲

寄溪帶軒主人

三首

迴溪帶層薄結字成高軒茂叔蓮墩池淵明柳近
門涼颺溪上迴瀟灑遍邱樊灘鴻雙雙鳴振鷺亦
翩翩中有岸猿人濯足臨潺湲長吟命柔翰烟光
相吐吞修名在身後意適餘安論愛此眼中景庶
幾永勿譏

筆陣賈深忌文彩生憂虞誰能結舌瘖淳樸憶古

初丹青有至理景物供馳驅春花與秋樹氣候歷
已殊點染異朱紫柯葉紛垂敷始知手腕間能與
大化符始知立象意書契徒區區笑問老庠諸渾
沌能余圖自當棄言語浩然觀太無

幽居不在深巖戶不在奇小築依周道宛然水中
坻楮墨集朋好茗酒時追隨裸坐忘主賓醉醒無
嫌疑但見青松陰會無赤日威我亦掩蓬戶屏跡
南山陲悠然在人境浩歌常自怡况偕素心友晨
夕門外溪何時相過從臨風思依依

衆芳館和先季豹先生石刻韻

窈窕瞿硎室委蛇萬仞溪中有曠世士好古凌梁
齊攬興留詩篇大雅絕羣蹊古調斷難續雲鳥春
無姿華館依曾城烟光何紛披捫蘿得奇文清風
欣韶衣一唱再三嘆嘆息日晷移榮名瓊樹華柯
葉同其歸安能起高躅至道心侶棲

喜半公歸自新都東寄索畫

病起看山山勢好溪橋醉醒一題詩相思白嶽人
歸處正是蒼崖雪霽時路轉層雲峰山沒水漸古

澗石逶迤心閒好景供圖畫肯寄荒齋慰別離

夏涼卽事

多病畏蒸暑幽棲還閉門涼風集朋好樂事在邱園

用元韻寄酬俞澗口先生先是倪觀湖先生
家瞿山耦長育丁山之約

林烟深處啟柴門遙憶丁山山下村青眼千秋憑
蠶簡素心幾輩破苔痕論文明月當軒靜把酒飛
花入座喧有約何當同著屐著書傾篋慰相存

題畫贈羅仲開

二首

坐吉山頭雪作堆，虛窓驚見老梅開。
新枝古幹情如許，已覺春風拂面來。

一樹梅花一卷書，幽人對此意何如。
偷閒獨自成玄草，多少閒前問字車。

宿家仲宣齋中

幽棲何所羨雅意，托邱園剪燭宵。
成賦含節日抱孫家聲，奇字舊古道。
濁醪存不用孤居，懷青山在葦門。

戲題杖首雙龍

二首

濟勝有君無絕險羊腸鳥道一時平登臨快意休
輕擲變化先愁風雨生

扶老賜鳩煩刻削靈株天性異凡容較書遮莫誇
黎火杖首今看雙燭龍

寄懷不次兄金斗

二首

南山鬱崔嵬珍木生其幽盤根覆百畝散柯直以
修度谷有高枝遠揚離其儔華實輝中林文彩施
別阪梁棟旣天性匠伯紛相投靈質念所生芳芬

翔故邱柔條托根下頗異蓬蒿流千霄徒有志勁
挺誰見收清風惠好音一本意何周感茲媿扶植
晚成庶爲謀

黃鵠初試羽瞻雲思入荒志意良在遠六翮若未
長翹首見中天逍遙鳴鳳凰饑餐日月華渴飲金
玉漿朝發扶桑顛夕至崑山陽求友雙青鳥結交
瑤池旁卑棲曾不忘顧盼生輝光天路浩無阻白
雲亦有鄉何當豐羽毛萬里同翱翔

偶成

丈夫志狷舉三山猶借途况乃爭失得耳目徒區區
區所畏顏鬢改歲月日以徂鍊鉛若無藉中夜起
踟躕天道無適莫栽培意豈殊庶幾守初服永矢
以勿渝

讀裴簡臣盆荷詩有作兼呈馬逸老

抄冬咨祈寒冰雪盈丈許大勝因大復亢害爲甚
暑波竭泥遂塵澤國焚焦土魚枯金石流况乃禾
與黍嬰娜官舍蓮托根誠得所高齋絕外闕驕陽
詎能悔灌溉時復勤盆池藉安堵虛室生微風幽

香作迴舞新葉自卷舒疎花共軒舉君子有餘閒
悠然命毫楮對茲佳卉清唱和成至語誰言簿書
劇獲此雲霞侶二氣豈無偏臆植真能補野人捧
新詩歎息重仰俯願以漱溪心沛爲郇伯雨廣厦
更千間蒼生庶寧宇

正月杪雨中喜姑溪唐祖延徐爾典過訪

細雨庭花發柴關盡不開十年蓬燕笑百里破蒿
萊往事堪回首春風有放懷床頭新濁酒歎息共
深杯

春仲上渡道中遇觀湖先生入山不至

林薄依道周晨露午未晞游目青峰端飄飄引我
思側見負薪人入市行復歸籃輿期未來長望心
躊躇

同道士登文脊

山水負奇嗜登陟饒勝情相將梯石磴盤曲歷遙
岑山空絕飛鳥飢虎號深林窄徑瞰危崖苔滑足
難任逡巡棄短杖連延仗葛藤興愜失險阻意堅
遺死生賤子感高義微軀安足論

與汪雨公飲酒旌陽 二首

何用中山千日期
酩然便是太平時
門前風雨急
無賴說與醉人
渾未知

醉倒山城風雨驕
山城外生江湖
與君却憶西
溪筏橋上相逢
破寂寥

次韻和瞿山醉月樓看雪兼以索畫

霽雪曉山浮光輝
併一樓百壺真
不醉十日只應
留寓目成佳句
揮毫足臥游
欄川逸興在不
負此
中幽

次韻和家鼎山素五天延閣看雪

百里弟兄聚登樓意念深飄飄遊遠目次第起狂吟
萬井寒光眩羣山朔氣沉只愁風雪住好景過難尋

偶成

浪說仙源隔休疑至道深任情依日用觀物見天心
和氣生微醉清風起獨吟浩然此時意大藥不須尋

題西溪圖贈汪元佐

潺湲橋下西溪水橋上觀魚數其尾一葉中流巢
父眠不羨垂綸洗雙耳壁張此圖聞潺湲門內門
外清流湍寄語橋西溪上客爆栗烹茶仔細看

西溪酌汪雨公適洪大度至

君不見返照入山風露滋卮酒飲君君莫辭人生
所難聚知己良夜淒清及此時君家山南我山北
逢迎却憶鍾山側石城城邊佳氣濃入眼秋山看
不得微廕偃蹇各歸棲山市黃花增太息太息一
杯復一杯西溪橋上幽人來幽人著書戶常閉班

荆茅店欣追陪自是吾儕多意氣豈有揚雄問奇
字濁醪易盡談未深倏忽長庚向西墜溪山不厭
再相尋來日相逢白雲寺

同阮次星洪天度陳孚吉汪雨公王禮北諸
子誦如德生崇宗諸上人游白雲寺追和

蕭太府石刻韻

二首

蕭森秋色在林邱竟日招攜慙勝游紅樹漫須驚
短鬢青山自可做滄洲林閑溪筏分行下地迴烟
嵐一片浮極目車塵看不見武陵風物此中留

風埃原不到林邱况共良朋策杖游弔古墳高香
火宅題詩秋滿蕙蘭洲寺尋曲登山鐘寂茶煮清
泉石乳浮莫以滄桑多感嘆君看斷碣只今留
祠今廢爲墳故三句及之

天度雨公招同孚吉禮北諸子雅集見示白

雲樓唱和詩仍用前韻奉酬

明二子附余小百

心閒隨處是丹邱載酒山城續舊游
騷客久知飽勝覽高吟重咏憶芳洲
攜來怪石烟霞合看去危橋端竦
浮良會年來真不易從判累日爲君留

題畫

秋氣淨纖埃
縱日愁榛莽
結廬山水間
臺高不敢上
愛此門前溪
波平時獨往
操觚寧未閒
不作江湖想

題畫

縹緲三神山
凌虛參斗牛
伏靈巖上松
歎息不可求
仙人鍊丹室
誰知委道周
弱水深未深
飛梁臥紫蚪
試問往來人
出戶能不由

又

縱有漁郎至山扉不用關
浩淼自春水人在白雲間

又

崖石淨於鏡春風不長苔
留與神仙扣雙鑲當自開

西津渡別汪雨公

我愛溪山起常早雲深失却行歌道
獨坐蓬窻祇自吟伊人忽至開懷抱
更酌西溪酒同上西溪橋
日出溪上山——看岩幾丈夫音
青峰色咫尺

烟光遮不得閉門相與期千秋分手斯須休歎息
庚戌至戊午

春過家楚山池上

動有經年別悠然百里思綠楊驚歲月清鏡媿顏
滑曳屐春山日挑燈夜雨時相看一回首雙淚欲
如絲

柏枧山逢採藥者爲之作歌

雲中農父斲山稗稗熟含啼稱世外不解有疾那
問醫桂蘭枯死棄蕭艾良卉天生用有時長鑱方

賁羅神奇雪霜榛莽自初古炎帝非逢誰更知世
人愛甘不愛苦珍熬屬厭還相賈寧知醜毒變膏
梁方書異類資攻補南北陰陽薰與蕪入肆出肆
憑雙眸此物微細功力鉅伸於知己隨所投吁嗟
越人會公不可作用汝殺人如刈藿孝子疇能釋
俗工忍使桂蘭名被惡不才何似臨山櫟匠伯不
顧全純樸

過訪家素朗讀書處

斜日苔階過虛堂散客襟慙勤尊酒意真率十年

心山色捲簾近書聲閉戶深但令幽興在無用歎
知音

舟泊皖城遇雨

二首

皖口黃梅雨曾無半日晴維舟依港曲高臥聽江
聲風定濤還怒潮迴岸欲平柁樓新燕子惟雨掠
波輕

一卷時歌枕江天只獨吟船窻風雨意樽酒醉眠
心棋局篙師共漁歌買客音人爭楊子席顧影一
閒襟

重過皖江呈陳默公先生時方有事於皖志

二首

迎江江寺再維舟江雨江風事事幽勝地圖經歸
太史野人高館識荊州如君琬琰千秋業顧我迂
疎五月裘孔李非緣曾世講懷中漫刺敢先投
芒屨何當倒屣迎慇懃握手慰平生元龍盡說高
居穩孺子深慚下榻情點筆江波窻外動論文牛
斗檻邊橫此時家學名山擅野客閒吟許細評

浮山大師哀辭

二首有小序
卽方文忠

某
晚學未獲侍浮公法席前年承自青原
致書徵象數之學時以草槩無副未敢馳
應又聞精舍方成將歸憩息私心竊喜奉
教有日也無何計聞癸丑夏舟泊皖江望
君子之舊廬而亦不能至因作短章用伸
哀悼

太空無留雲逝水無停淵天地有始終况乃天地
間誰云盛名累委順皆自然生死既同條洞觀無
始先吁嗟我浮公往來胡憾焉所歎哲人萎嚙與

傳無言教體見真一豈必逃枯禪遺書在天壤誦
之增涕漣

大易含參兩靈秘開馬圖柯葉同本根昧者岐精
粗維公學海宗涓流念狂愚惠然垂遠聞下微微
末書便欲溯大江面命鍼其疎塵累苦相牽歲月
忽已徂負此雙目明不見當世儒臨風歌一言遠
寄同生芻英爽發昭明鑒此忱區區

復東方位伯

方子精西學愚病西儒排古算數著方程

論謂雖利氏無以難故欲質之方子

象數豈絕學因人成古今創始良獨難踵事生其
新測量變西儒已知無昔人便欲廢籌策三率歸
同文寧知九數理灼灼二支分句股測體綫隱襍
恃方程安得以比例盡遺古法精勿庵有病夫閒
居發疑情展轉重思維忽似窺其根和較有實用
正負非強名始信學者過沿古殊失真辟彼車與
騎用之各有神籀籀夫豈拙弩喙日以親援筆注
所見卷帙遂相仍念子學有宗何當細與論

柏規山

二首

谷險紆成徑雲開近見山
岩花春後好石蘚雨餘
殷響苔樵人斧烟生衲子關
岱華紛馬跡誰勝此
中間

巖犬吠深匿藤橋客過稀
木皮蒙竹屋澗戶啟繩
扉生計無營足山蔬不摘肥
相逢問城郭祇似昔
年非

癸丑冬喜不次兄旋里

溪干輕雨浥征衣有客監輿
江上歸經術自茲當

世用琴尊肯與故人違
山邨春近梅花發
巖戶寒深桂樹稀
耆舊相看君努力
家園風物已多非

陪不次兄謁祠墓

二首

從君無少長
歡集意何如
光耀知先澤
趨踰慰索居
獻酬忘日夕
枯朽藉吹噓
祠宇松楸色
春生寒雨餘

廿載長爲客
能無邱壟悲
迴溪曾未改
豐碣有餘思
世德君能紹
家聲起自茲
慚余守鄉邑
蓬矢用何時

拜九一公墓口號同天章爾止暨五弟

古木蟻爲室深箐鳥不過四朝存墓道一徑入煙蘿
大後心何已承家事豈多相期爲不朽年往莫蹉跎

題畫

二首

木落寒江秋水靜危巖千尺絕纖埃停橈獨坐疎
林外時有輕雲渡水來

閣起釣竿焚筆研夢魂無復向人間從教振海風
濤壯野客扁舟意自閒

重過梧軒感作短歌贈徐爾哲昆季

湖上青山山下村，水田漠漠垂楊深。憶昨褰裳來

信宿，主人道舊開清尊。酒酣更酌湖月蕩，觴政初

行歌。始放徐公羣從擅風流，吾家阮籍亦豪宕。

謂家

叔仙輔嗣清言一座傾，王非石先生

痛飲不知天。

在上十載重來客，鬢改梧軒花樹依然在。故人驚

對念存亡，歎息人琴淚同灑。

時令伯梓甫先生暨非石仙林俱已化去

勸君且莫悲疇昔，竹几蕉窗書卷積。人生最樂弟

昆賢，况復家學承淵源。好看努力青霄立，慰爾高

堂華髮年

網籐阮夜雨

雷懸山雨急風定石泉鳴萬壑連爲瀑千峯撼欲
平虛堂漁艇似短燭月華明恍忽乘槎去全移世
內情

贈中伯弟

三首

逸足無遙途健翮豈近舉野馬培長風蟻封閑皂
圍豈不樂宣遊歲月其吾與春風變鳴禽倏忽易
寒暑所以古志人茶蓼甘自茹

茶蓼茹有時男兒生有爲燦燦荆山壁濯濯連城
姿琅琅薦天廟輝輝光陸離豈不貴自然抱璞誰
能知他山有礬石攻錯以爲期

攻錯美日新長貧安足訴懷寶而被褐聊以愜吾
素炫服豈不榮速成豈不慕國工愛其璞執玉敬
爾步南山有文豹七日隱朝霧

盤峰僧舍

四首

望處羣峰合登來積竊微凌虛懸曲磴盤石想雙
扉谷杳樹還閉山空僧獨歸林端忽雞犬野客興

遊飛

大地苦初熱春光宛在茲
久居看自足未到說應疑
茶熟剝園筍窻開俯藥籬
潺湲鳴小閣竹規起涼颺

松石坐塵外臨風指顧豪
層巒環翠疊遠水入雲高
邨襍千畦麥河紫萬圃桃
舟車連道路來往自滔滔

日觀波濤駭峨眉烟霧重
尋常虛夢寐眴眴慙情
悰風過一天靜機忘太古
逢何當遺世累朝夕此

扶邛

飲家卓公舍爲之作歌同聖占

萬事真堪付杯酒有酒從君傾自斗人生聚散風
中柳少年昨日今衰朽雪夜良朋酒一卮相看共
憶少年時嚴課高齋晨授几細語疎鐙宵對棋世
態何由入懷抱置身共許青雲早那知流水逐年
華蹉跎坐令朱顏槁多君意氣凌千秋汗漫曾爲
萬里游詩成慷慨歌燕市意到跌宕看吳鉤吁嗟
丈夫豈肯懷鄉井壯心幾載向人盡秋風不是爲

鱸魚五斗誰能易三徑大笑不如歸去來舉世何
人真愛才昭王賓客空荒臺千金駿馬皆塵埃富
貴於我何有哉

宿觀湖草堂讀賀武受集

二首

風雨近深夜壺觴初罷時閒緘相歎息烈士有遺
詩磊落江湖氣淋漓憑吊辭挑鐙重擊節慷慨見
須眉

麟閣人安在滕王址僅存蒼涼身外事浩蕩手中
尊未握乾坤極誰超今古藩生平爾半落欲慰不

能言

送姜學在歸吳門

午橋雨過社鵲啼歸客扁舟發宛溪下
瀨薰風吹去棹到家綠樹徧長堤
伯兄稚子經年別畫舸名園幾處題
難忘敬亭山下路清秋遲爾共扶藜

汝舟弟城西書屋

二首

著屐尋春春雨後春城駘蕩柳絲長
小樓曲巷無人到消得清尊盡日狂

相對銜杯忘日暮
憑虛醉眼就攤書
不知市上有

何事得到青鐙一卷餘

欲曙

華鐙明滅雞長號東方欲曙須女高掩卷太息引
大白人生百歲何其勞眼前萬事已如此千秋意
氣原吾曹屈指自古幾英傑未遇旣遇皆蓬蒿君
不見昨日飛來風裊絮今朝落盡溪干桃丈夫用
志必有托身外失得隨所遭

曾孫鈞 校字

續學堂詩鈔卷二

宛陵梅文鼎定九甫著 孫穀成循齋甫較梓

己未

家瞿山招同諸子集天延閣奉餞施愚山先生往遊天台

敬亭秋色雨溟濛江郭千家煙樹中
卮酒論心輸我輩名山作賦有羣公
何時杖屨從幽討是處川巖思不窮
雁蕩天台今獨擅摩崖題字葉初紅

贈當湖陸亦樵

當湖有客鬢初艾，早持佛偈遊方內。縞帶結交齊魯閒，扁舟遠涉瓊山外。負笈悠然宛水來，逢迎正值黃花開。名勝閒過謝竿牘，友朋歡對遺塵埃。祇今道上紛裘馬，騎鶴揚州稱達者。過眼黃金身後榮，役役爲人憂大夏。羨汝逍遙無所營，不宦不昏人累輕。南北東西恣幽討，竹杖芒鞋非世情。我亦疎慵厭餘事，因君堅我尋真志。何當大笑出柴扉，遠遊自適平生意。莫令世上知名字。

送章穎叔歸山陰

四首

一氣兆溟濤胡然分兩儀晶明爲日星至教儼在
茲卓哉古賢聖晝夜能通知文字沿誦述耳食稱
無疑戴履昧高厚塊處同醢雞志人深憤悱伏讀
仰而思秘冊勤手鈔銳欲探淵微此意良愧君下
問忘愚癡

古籍曾秦炬遺文存無援神證曲說樊然生異
趨天道幸非遠求端理不迂立表見其景數度微
相符占測語不詳求流增矯枉泥文如待兔空縶
道傍株順天以求合庶幾逢本初相期一乃心襟

學非通儒

北政有凌犯逆留皆失行今以數求之良由軌道
生薄蝕驗九服視差曾未平踵事成密率誰言古
未精未可忽天戒三才同一情耆儒推橋李能兼
兩法并象林存古占西測詳從衡舟行入嘉禾寧
辭共發明

橋李陳獻可先生年過八十著述甚富
余惟見象林度算二書及所製矩度器

皆精核
無倫

聚散原非偶行藏寧豫謀俯仰視天地運處誰自
由所冀學有獲深造雅優游君歸依子舍高堂有

白頭率婦奉脩脯或無輕遠遊儻來問妾間枉道
重咨諏刮目擬相待努力紹前修道器豈上下根
堅華實收

穎叔婦翁
官婺源

贈魏在湄先輩

憶我方成童道古慕黃耆宿學陳蓮人忘年交握
手爲言金龍山授經人不朽明祖駐徐州舟師相
距久雲中忽老儒揮河河逆走我軍成上游形便
獲羣醜深夜謁夢寐謝緒拜稽首草莽宋孤臣崖
山間失守望絕蹈湖水遺言幸無負帝曰咨爾神

忠貞古難有汝其王金龍廟祀黃河自魏子舊諸
生捫碣酌杯酒撫時增慷慨深信茲事有我懷
遠人言今見遠人友蹉跎感歲華四十衰蒲柳而公
神愈王翛然遠塵垢將無稟氣異德全全所受古
意爲君歌視今良在後

耦長母劉太君七十

二首

誰言芝無根采擷每神仙誰言醴無源和氣蒸爲
泉吾宗有貞母敝廬纔數間旣矢共姜志還欽柳
母傳鞠子見成立斐然名大賢花發在三春苞孕

惟永堅

滄洲垂諫草石室傳良書不朽寧在言經國多訐
謨所以書帶人接武爲真儒母也見而知良與世
情殊教誨惟義方富貴徒區區庶幾敦實學令名
常似初滄洲摘草先大中公集名公生禹金公有
鹿裘石室諸書公之孫朗三先生有書帶
園草皆行于世
先生攜長父也

贈龍潭董道生

舊說龍潭勝谷過處士廬迴溪通曲逕密竹護幽
居美酒留賓客高言見古初阿戎才更好文史足

三餘

金長真觀察見委西席晉謁

二首

開府才名舊甘棠化雨新江邦依廣夏前席竚

楓宸吐握羅英俊東南盡主賓尚憂對非棄采擇

到荆榛

絳帳寧吾事迂疎實鮮宜下文驚異數遠道實多

儀深慰荊州願難酬國士知自慙經術淺何以侍

臯比

觀察偶詢曆法爲作測算之圖古詩四章以

當國說

古道竊深慕升降難具論尚書肇帝典敬授有遺
言永短稽日影虛昴辨初昏至今求歲差援爲推
步根義和命叔仲南朔判寒溫賓餞宅東西里差
亦可原猗歟帝垂衣庶務簡不繁幸茲欽若意千
秋聊復存寧徒象數該伊維道義門其敢稱縫掖
仰俯昧乾坤

至闢生萬有先天觀太無杳冥恍惚中變化成須
臾乾健曰西運列曜紛陳祖錯行旋左右遲速各

有途在昔先知者積厚遺書圖六曆稜真贗可稽
唯太初自茲代改憲七十家有餘天道故遼遠千
載週盈虛微差近難睹世久乃見渝所以今巧曆
恆覺古人疎能忘創始勞萬事有權輿

九重孰營度屈子昔言之歐羅析渾圓五緯異崇
卑屑屑儼剝蔥晶瑩如玻璃西士寶斯術守之不
復疑徐公加密測後出乃稱奇遠鏡啓長庚望
亦有時如輪圍太陽五星具可知列曜居其人行
變各有差互入復相容天能非所思數得理亦諧

妙合真吾師

星輪有大小逆順歸自然舊率頗荒畧占經傳會
傳九土分星堊粵自始封年封建既無稽南北多
所遷國名代有更疆域寧久沿而据甘與石珍彼
得魚釜今以七曜理展轉推大圓大塊成黍珠中
處了無偏精氣互灌輸光景交迴旋藐躬洵微塵
戴履亦相連尚守大易訓終日以乾乾

署中夜坐有懷周龍客施虹玉

悠悠江水懷人遠咫尺宮齋見面遲絳帳笙歌名

習靜青鐙書卷重相思春風到處桃花放野興應
多蠟屐隨更憶洪崖曾北上郵筒幾度寄新詩

秋朝

也士

寄懷吳子遠淮上

二首時
新移居

官舍棠花紅欲開懷人千里一登臺練湖風雨輕

離別

客秋相晤丹陽匆
匆數語默然而別

淮水烟波獨往來

子遠歸
自淮未

幾即移
家往

敢忘丁寧書問意

兩屨手書
重蒙勉勵

堪驚老大鬢

毛催青溪鐙火冬春共此地思君首重回

卯辰間
同客秦

淮入
丹

半鎔丹藥一囊書處處行窩樂有餘久客長淮多
素侶新移家室好安居高齋夜月論心靜過闌春
船鼓櫂徐何日潮洲從杖屨相將世外狎樵漁

清明見柳條有感懷山中諸弟子姪

忽見楊枝欲斷腸始知羈旅易悲傷衰顏半百翻
爲客令節清明獨憶鄉梅隴桃花初綽約大勞春
水未汪洋此時攜手穿雲望應念懷歸天一方

大勞二山名先
人邱墓在其上

二月廿九日寄書五弟

是日爲弟生辰
子生辰亦此月

寒食初過晝漸長園池草樹闌年芳繁花紺映蕪
青畔嫩葉紅舒薛荔牆兩字平安將遠意雙魚珍
重溯江鄉柔弧蓬矢勗勞日獨坐封書派萬行

雨後東家白也菜市

園林疎雨過新綠定交加野鳥平添語畦蔬倍長
芽吟成舒遠目酒醒到鄰家爲圖何年遂相依小
徑斜

送金在五入都補選 二首

清才美政著皇州公子翩翩第一流省侍江邦依

子舍馳驅京國聽鳴騶卷書朝爽開油壁杯酒旗
亭脫蒯緱更有聯鑣吳季子新詩驛路好磨酬
生隱堂前好雨過此時難別意如何明窓習靜伊
人近午夜徵歌雅興多小立名園花照耀劇談高
館樹婆婆從知帝里相思日郎署風清看芰荷

庚申

二月冒雨遊水西故人趙元生以肴核至

三年勝地虛良約

丁巳戊午間舍姪補長曾有水西之約

二月春潭

祇獨遊山雨驟飛遲問渡溪光欲霽競登舟幾回

自笑煙霞癖却喜相逢水石幽
載酒招邀穿竹徑
梅花深處共淹留

煙雨亭雨中春望

白雲山下曉雲低
煙雨亭中春雨迷
曳屐登巖尋古寺
移尊宛轉上層梯
千家粉堞波光映
萬疊林巒樹色齊
望裏承流峰隱見
何當旭日此扶藜

三月六日周雪客蔡璣先招同閩藍公漪歙
程穆倩施虹玉鳩茲湯與三瀨水陳二游
錫山顧天石句曲孫凱之鍾山張瑤星集

觀行堂分五微

華堂良宴會令節正芳菲勝地名賢集雄文大雅
歸虛窻羅萬卷旭日敞雙扉竝作蘭亭集同簪
子帷園花初灼灼庭樹自依依歲序仍修禊歌聲
復采薇深杯傾白墜往蹟說烏衣感昔悲京國憂
時憶釣磯楸枰移永晝搏陣送斜暉掌故徵文信
清言握麈微更燒銀蠟短還促羽觴飛共信千秋
在誰知六代非興酣無主客爛醉已忘機

春日步出青溪尋東園故處同虹玉黎莊璣

先諸子

青溪故有張麗華墓魏國公東園與舊院相望今皆廢爲圃相傳正

德南巡釣

魚於此

駱宕春光徧石城疎林曲岸鳥嚶嚶花還周處臺
邊發草自麗華墳畔生舊曲曾邀清蹕駐東園猶
有上公名百年歌舞餘蔬圃日暮題詩無限情

濟北王子側中翰訪余於觀行堂與紀伯紫

施虹玉飲酒賦詩夜分乃去余偶被寒謝

客明發讀諸公作病良已亦得一律

時子園遣

歸新城

快雨崇朝清几榻名賢千里慰相思微軀假寒疎
良晤宿疾消除藉好詩庭樹葉新鶯語滑江帆風
穩燕飛遲正憐客裏春歸易那更相逢遽別離

又五律一首爲子側贈行

先是子側送宛陵
余來白門未相見

也

宛水春遊樂秦淮夜飲遲逢迎如巧避言笑失追
隨風雅君家擅江山此處奇如何一相見祇有送

行詩

子側爲阮
亭先生弟

追和王東亭雪中坐開元寺觀家瞿山宛陵

圖景

二月將半雪數尺谿谷積素成高陵北風怒號陽
坡道旅懷獨對開元僧妙畫嶙峋臥遊具新詩傲
兀才人能憶余是時正行役飢人滿目徒哀矜

喜魏永叔徵君來白門卽送之吳興用王璞

莽韻

思君擬入翠微遊何幸相逢江上舟雅望四方歸
露月高文一字卽陽秋樓窻夜午占朱鳥酒殘天
清對白鷗不盡連床句日意遲遲應爲楚人留

午日同諸公泛舟秦淮

同遊者南豐甘捷齊
雲素梁贊人寧都魏

叔子泉州丁厓水部汝黃僉都漳州王璞

庵黃岡杜千阜侯官藍公濟楊州程穆倩

葵源吳季六溧陽陳二游徽州張貫玉休

寧施虹玉宣城王四及主人則敘張永季

上元蔡龍文環

先茲升五玉

秦淮水滿垂楊綠畫船簫鼓聲相屬桂館平臨朱

雀橋蘭橈直泛青溪曲溪流激激接江城闌干處

處俯彫甍釵頭艾虎穿簾墮屋角榴花照水明揮

杯永日都忘倦醉來恍惚仙槎轉船裏鐙連岸上

光風前影動烟中豔燭龍天矯迴天漢千點繁星

看一片火齊五色琉璃屏晃耀金波雙眼眩勝地
芳辰不易逢况復朋來萬里同爲語嚴更且休促
明朝馬首各西東

一研齋詩爲吳介茲作 二首

齋在魏國公東花園地爲鄒滿宇故居原名節愛閣介茲有櫟園先生贈研齋其齋以志不忘

江城盤鬱水田紆季子頻年此卜居地是上公休
沐舊閣爲高士嘯歌餘沿籬野徑閒懷古繞屋清
池獨釣魚知已難忘存一研齋然題作櫟園書

相看意氣自蕭疎半畝何妨且著書長鉞依人非
遠計高吟抱膝有閒居門近好種先生柳巷曲偏
勞長者車我亦乘秋歸柏枧青山紅樹認吾廬

閒吟

世事滄江水滔滔日夜流不知江上月猶似古時
否籬菊安霜露圓梧識早秋閒吟觀萬物此外復
何求

觀行堂主人邀同余公沛鐙下看菊

一夜西風江水乾鍾山萬井入新寒籃輿此日還

書屋小圃黃昏理藥欄
叢菊尚開三徑好
朱花似點百年丹
移歸簾幕爲清供
與客持螯秉燭看

寄懷桐城方素北

四首

撰述承先澤
名山業在君
踰垣逃薦辟
避地托耕芸
世德三朝著
遺書四海聞
况多羣從美
丙夜一燈分

花盞圖前路逢君金粟庵
高懷欣邂逅奇賞愜幽探
江閣陪舒敞
鐙船快合簪
聯床還累夕
襖被過城南

時與叔子在白門素
光與余皆相親語

良書開百代能決古今疑夾漈何多讓鄱陽未足

奇流通高義見嘉惠後賢思曆譜言曾學憑誰助

棗梨

素北晉古今決疑如執
太守楊公為捐作按梓

君別長干後荆同伯子班遙傳皇甫敘一破隱侯

顏

別後聯田伯子泰淮因附訊位自無何
以中西昇學敘郵至余方病為之霍然秋水東

西屋聽江大小山稻花清絕處許我滌柴關

素北
羣從

各有隱居典

稻花相望

寄方位白

五首

屈指相尋過曲巷驚心別去又三秋多君著撰棲

南畝媿我飄零但白頭小阮遊還依幕府阿戎才

已慰箕裘一尊何日重歡聚悵望長江天際舟

戊午

秋與舍姪甥長晤位白喬梓于府巷是歲甥長遊燕南畝位白隱居名

中丞廷尉有淵源羣從于今家學傳握手秦淮先

後至知名皖上弟兄賢慇懃兩月書頻及珍重千

秋序一篇相訊年來將北轍可能聯轡帝城邊

間伯

素北與今夏得晤長于余刻中西算學通位白序之

唐虞絕學是羲和昧谷嵎夷測驗過君繼浮山開

平會曆師尼閣擅歐羅太陽五緯重輪抱黃道春

分差數多我亦中西兼考訂誰期與子共編摩

穆先

生尼閣位白師共新西
法為崇禎曆書所未及

私淑青原虛此心遺文一讀一沾襟炮莊罕識通

微妙物理誰能質測深遠索著書扶後進坐乖良

賸負知音終當拜展先生墓仰止高秋楓樹林

文忠

公書來索觀小
著余目猶未往

天經新語各為工今古諸家抄會通此事能兼推

宿學伊人難老在山東數資圖譜乘除省法授新

西思議窮幾欲遺書相討論悲君為我一參同

青州

薛儀甫先生著天學會
通發中西兩家之要

九日

出門峰遠近繞屋水潺湲秋樹和煙澹晴雲共鳥
還呼兒斟白酒與弟看青山茲樂違三歲悠然憶
竹關

喜晤彭躬庵先生卽送歸冠石

先生別號樹
盛有冬心詩

卷一

曾向冬心見樹廬人間萬事一編書相看此際天
難問却喜耆年鬢未疎浩蕩秋空涵日月清冷江

木辨龍魚布帆風滿君歸去萬里行雲自卷舒

將歸宣城留別秦淮友人

九月江南楓葉丹歸心此日在征鞍遲遲總爲奇
書戀渺渺何知客路難雁過長空瞻顧闊魚依深
沼泳游安清風百里隨行笈一笑還山天地寬

留別蔡璣先

四首

一載羈棲觀行堂堪驚病裏歷年光餘生賴有歌
吟在起死非關藥物良蘭入深叢花自若鴻遵磐
石意相憶憶君自此如江水日日東流千里長

春和坐眺清涼寺秋爽行遊聚寶山懷古總歸詩
思逸看花常共酒尊閒異書借讀精警校佳客遙
過快往還善病如余唯伏枕因君忘却鬢毛斑
龍溪羣從總翩翩好古如伊倍可憐名理特張元
晦幟雄姿欲著祖生鞭能持高論傾時輩每刻傳
書表昔賢善謔亦徵才氣好與余相對獨淵然
巖戶優游耽僻嗜天涯翹望是同心敢言絕學安
孤陋何幸良朋慰賞音妙會誰能旬日了精思轉
愧廿年深一編從此留天壤流水高山在玉琴

贈別黃徵君愈邵 二首

千頃樓前竹風來萬个清霜寒良友意歲宴遠遊
情酒舫思桃葉歸舟望冶城江南花放日君已在
承明

當代藏書擅牙籤埒絳雲富能徵四庫異不數三
墳國論多偏黨儒生狃習聞待君成信史編纂莫
辭勤

寄懷青州薛儀甫先生 四首

聖教日以遠六藝同榛蕪今惟九數存斯民日用

需流俗溺佔畢實學翻爲迂豈知參與兩恆爲萬
事樞仰俯欽至教禮樂生苞符所以古人言三才
通爲儒自非精探索何以藥虛無君子任名教而
無章句拘著撰極高深事理兼陳敷當世有同方
千里良非孤引領青齊間渺渺瞻長途

大地一黍米包舉至圓中積候成精測寧殊西與
東三角御弧度八綫量虛空竊觀歐羅言度數爲
專功思之廢寢食與義心神通簡平及渾蓋臆製
亦能工唯恨棲深山奇書實罕逢我欲往從之所

學殊難同詎忍棄儒先翻然西說攻或欲暫學曆
論交患不忠立身天地內誰能異初終晚始得君
書昭昭如發蒙曾不事耶穌而能彼術窮乃知問
郊者不墜古人風安得相追隨而命開其牖

西曆譯先代傍通稱十事爰及殺青時未見彰斯
義將毋靳廣傳私之以爲秘乃若兵家謀亦復資
巧思我讀守圉書重下徐公淚神威及曠遠良哉
攻守器當時卒用公封疆豈輕棄執轡果何人歷
險失騏驎國論歸黨同嘉謨阻深忌會通及師學

要眇益人智法制殊不悉知君有深意跼突自重
淵妙理參天地運轉如督任徵奇于焉至用茲爲
灌溉農畝將蒙利何亦不盡言悠然窮擬議願君
發藏笈慷慨憐同志臨風實跂予莫惜微言寄
通考述占驗未及曆家言亦有續文獻闕畧不足
存邢公考律曆將決授時藩古法語不詳安能探
本根豈知法沿革踵事有淵源西術肇九執札馬
顯前元回曆自洪武凌犯實專門分科兼肄習年
年陳至尊利氏術加密轉爲疑者喧以茲重發憤

搜羅不憚煩中西數十家一一爲討論一葉泛長
河乃欲窮崑崙間途豈不遙賴君爲張鑿合并果
何時悠悠勞夢魂

賦得閉戶著書多歲月

白雲多處有山村滿徑松杉薜荔門黃卷頗容消
歲月紅塵那許到邱園身安巖壑聰明壹道在希
夷筆墨尊幾度文成還命酒春花秋月對羲軒

辛酉

元旦恭謁 典膳公像

春風吹雪到山村曙色寒光映短垣
盥櫛晨趨環少長庭階森列肅蘋蘩
家聲誰可孫謀慰歲序同瞻遺像尊
稍喜兒童知拜跪自慙衰白負深恩

雨不得就霞蒸弟飲漫成代簡

午夜無眠老態成時時欹枕待雞聲
東風忽送簷前雨春水遙知溪上生
遠涉經年勞夢想嘉招咫尺阻逢迎
明朝霽色尋山徑連袂高歌尊酒清

寄高汝霖金斗

雨歇修林鶯語頻封書寄與遠遊人
山村漸插禾

苗徧肥水應嘗麥飯新問字已知多益友成家更
喜托芳鄰歸來執手看顏鬢我亦東西南北身

錫山陳集生書來索刻近著

長夏高歌溪上邨松風一枕臥潺湲故人寄訊廻
清夢江閣相逢憶白門玄草未成空閉戶修名欲
托愧傳言擎舟爲語張平子乘興何當惠水源

金陵雜詩 七首

金水河邊秋葉紅五龍橋下水如弓何年尚食遺
官箸拾得黃金泥淖中

迢遞天街舊內通，千官朝會午門同。
祇今斷礎橫周道，龍鳳飛鳴鏤刻工。

鍾山北倚內城紆，道是當年燕雀湖。
萬戶千門何處所，還憑宮瓦說皇都。

玲瓏殿瓦是琉璃，奪目晶輝四照奇。
幾片青黃遮草屋，斜陽相映各參差。

闕門相對正陽開，兩觀崢嶸亦壯哉。
丹堊歸然飛閣墮，蟬聯荆棘上高臺。

午日爲季弟尊素製日晷并繫以詩 六首

多種加時法赤道以爲宗里差有南北低昂勢不
同玄術取衝度聊以擬形容誰與明斯理寂歷游

鴻濛

裏音

鴻濛一黍米廓然涵太虛積氣爲光耀運行常自
如永短類燈影明晦隨方隅所以古至人冥意觀

元樞

憶同師邵子秦淮渺斯器復因山陰何斟酌新其
製歲月忽遷改迴首滄江逝何當息諸緣相將爲

久視

吳子遠號師邵丹陽人何奕美山陰人

疇昔學授時與子及和仲運籌常夜丙尊尊同講
誦已乃得西書唯余兩人共過此誰復知人世真
如夢

生平耽曆祿臆息廿年餘敢謂窺奇秘庶幾祛矯
誣技成果無用俯仰聊自娛有得憑誰語惟君讀
我書

至理何精粗讀書有深淺試觀晷徑寸周天詳發
歛優柔以厭飫心靈將自顯專一通神明三才無

浩衍

簡舊稿 二首

行年今五十乃復數行墨鼓勇逐少年進速爭晷刻豈忍效頻笑殊難任胸臆生平厭支離聖道妄窺測安能違素心俯仰事邊幅辟如海中岸陸走就羈勒自謂範馳驅終不中程式投筆苦未早念之增太息

筆研久當焚精力况衰朽低徊念耄年雙親初白首殷勤授我經茲意將終負逮養已不能那用榮

華綬庶令書種存
逝將家學守遙遙
望來茲不知誰爲後
以茲重蹉跎
出處兩無取
豈敢名薄技
千金珍微帚

題矩算

南燭有高枝
鳴蟬咽脩林
戶牖何軒豁
苦茗時自斟
端居清衆處
庭蕉生綠陰
奇器熙無言
萬象亦以森
微風來西南
冷然開我襟

讀栗亭詩有懷東西洞庭

我友湯聖弘
昔家太湖裏
語我洞庭山
東西接天

起今日誦新詩選勝一何美
安能續快遊鼓棹乘
春水放歌縹緲顛濯足
漁山趾坐聽胥江濤泠泠
清吾耳

癸亥

病間有作

八月十二日曹唐

營魄銷垂盡憧憧仍故吾
衆慮何當冥曠然心顏
舒古人毫進德將毋稟賦殊
圭璧成琢磨形衰志
豈渝陰陽不能寇天遊
恆自如悔往抑何爲努力
收桑榆

龍眠陳滌岑先生寓書以江南通志呈野屬

訂

東南文獻尊者碩圖譜周咨更腐儒荒野安從闕
秘典尺書遠慰到繩樞離羣十載時虛度臥病後
旬骨乍蘇起步中庭秋月迴臨風懷舊重踟躕

雨不得往幼龍兄代東

二首

風雨重陽後銜杯興若何黃花霜裏豔詩思老來
多客至供雞黍門閒繞薜蘿幾時乘霽色過汝

懸河

相看俱老大
謔浪憶他年
痛飲花時酒
狂歌醉後篇
齒將遽瑗化
白尚子雲玄
有子堪娛目
偕咍郭
外田

劉子懷之弟讓以從戎尹臨桂卒任觀察簡
公哀其以死勤事也爲殯于龍安走書告
其家劉子往返經年載柩以歸皆觀察爲
之經紀余悲劉子之事高簡公之義作詩
咏之

百學荒榛道崎嶇萬里行淒涼扶旅觀迢遞歷歸

程衡浦瘴烟滿羅江烽火明使君生死誼欲述淚
先盈

呂山遇雪

山居愛雪每登樓極目層巔想勝遊偶趁春晴過
絕巘俄逢飛霰到神邱沿籬下見千峰冷啟戶平
看積素浮梵唄淒清入境隔置身今在雪山頭

甲子

江上望九華山慨焉有感

曾聞九子山險怪類西岳攢簇全芙蓉崢嶸發華

夢我來江上看烟光喜澄廓奇峰縹緲間一一青
如削百里勢不絕蜿蜒相廻薄扁舟不可停所見
乍前却參差互出沒靈異難適度振衣思高顛攀
躋一何樂長歌入杳冥凌風瞰大壑身輕生羽翼
虛無行碧落平生慕至道幽探性所託于役曾未
休天遊壞六鑿福地僅依棲曠然解塵縛敢忘夙
昔心敬與山靈約

送海寧范文碧入都

畸人生東海屐齒遍山川飄飄扶竹杖孤雲翔遠

天詩成命斗酒獨酌意悠然擘窠作大書落紙人
爭傳汗漫遊秦晉慷慨涉齊燕荆楚覽爲家去住
了無牽谷神得妙旨自信能長年浮華盡剷除相
對如枯禪叩之曾不窮博聞心若淵時以出塵理
助成及物緣今復適京國忽若凌紫烟江城送君
別高歌還自憐泛梗隨長風洪波相與旋於世誠
無求素位胡憂煎媿我慕采真亦受還丹篇服食
良簡易所難俗慮蠲舉目望神州往往多飛仙何
獨守窮巷跼蹐成華顛

陳照江招集借園同諸子得能字

雙扉開曲巷花徑集良朋微雨秋無恙深杯客亦
能遠遊思屈子長嘯憶孫登共信還丹有相將說
五陵

雨花臺同武修聯句

小步憩層巒

武

秋原霽色寒風颿江外白

定

烟樹

雨餘丹城郭千家簇

武

笙歌六代殘憑高無限思

定

未覺酒杯寬

武

長干僧舍和武修韻

江雨送秋寒秋光尚未闌青藤垂古屋丹卉映雕欄
好領銜杯趣無言行路難放懷天地外白眼任相
看

寄懷山陰何奕美

石頭城下雨初晴莫愁湖畔晚潮生懷人欲買剡
溪棹放眼山陰道上行

白雉爲鸞阿戴務旃作

碧落廬前白雉鳴烟巒響禽倍淒清乍疑陳寶祠
邊响不作殷王鼎耳聲純素自安山澤性榮華肯

與世情爭珍奇多少樊籠翫羨爾翔翔物外輕

十月三日同陳二游蔡九霞曹洽波郝仲知

王璞菴蔡鉉开放舟秦淮

載酒泛冬晴秦淮雨後平雕闌隨處泊霜樹幾株
橫人與滄洲靜歌宜子夜清迴橈鍾阜見長望不
勝情

題傅濟川小影

濟川善地形
著三會正服

疇昔宛溪湄招提共棲止朝聞誦金經晝出看山
水別去曾幾何歷年餘一紀爲君題像者多爲人

人矣利那成古今歲運疾于駛自愧守蓬蘽徒然
衰髮齒君遊一何健燕齊環杖履風塵留好顏視
昔轉豐美無以贈君行呵凍聊書此他時能復來
細論三會旨

潛菴湯公屢辱詢及欲以明史歷志屬爲校
定且曰徐公健菴蓋嘗稱之余于兩公會
無通問

史志兼蒐采千秋數晉隨圖書聊自適姓字詩人
知深惡周諮意初無獨到奇開花山徑發把酒一

題詩

乙丑

董樵谷先輩自文登來宣展姜貞毅公祠墓
會吳中亦建雙忠祠祀公兄弟因復往吳
賦此送之

西山今日存遺老盛典重逢慰遠遊
殘雪敬亭扶竹杖春風吳苑放輕舟
生芻萬里交情見俎豆雙祠直道留
此去簪裾羣屬目瘳瓢野服傲滄洲

贈董樵谷 三首

海濱一樵父木食草爲衣結廬西山巔與世長相
辭橡栗不常給豐歲猶苦飢妻孥併日餐歡欣無
怨咨荷笠時出遊道逢馬上兒袷服鬪新異馳逐
誇輕肥古獺人稀觀瞥見驚且疑去去勿復道隱
顯塗相違孤居習海市崢嶸曾幾時惟茲一寸心
滄桑終勿移

魯連蹈溟渤嶢然遺物累於趙復何求不去闔城
內談笑責垣衍片言失秦帝浩氣折其衝匪直齒
牙利從來遠引人豈獨能忘世在昔姜黃門踰垣

謝長吏馴僮起投閒搜金紛攘臂親交壁上觀屏
息仍多畏西山熊者知黃冠出城市立爲白其誣
排解誠高義人間多不平安得如公輩

陶唐命羲仲賓日宅嵎峽惟君棲不夜開門東海
涯不須登日觀夜夜聞天籟初陽湧扶桑方圓常
異闕雖無風與霏光彩日增奇因知曆家理清潔
氣所爲昔我推句股測量通中西嗜癖苦難同引
領唯青齊伊人忽以徂有懷將質誰邂逅慰平生
薛公君所師兼聞令嗣賢家學會未弛何日因君

往抵掌開雙眉

姜茲山將歸萊陽瘞貞毅公遺齒遂遷母觀
來敬亭爲之作詩

炎歊方鬱蒸暑雨亦載塗萊陽姜伯子千里從征
車間君安所之逝將歸舊廬豈曰懷鄉土蓼莪悲
有餘痛艾尊君命易寶有遺書歸骨必成所理勿
旋故鄉伯子泣遵教敬亭攜厥琴所傷遠先兆魂
魄長嗟吁惟公性忠孝平生敬髮膚墮齒計有四
什襲同琲珠古人斂棄爪憤終埋不誣齒堅亦骨

類播遷曾與俱爰諏窀穸期奉齒東北徂將用族
葬儀附瘞先墳闕豐碑題馬鬣齒墓從茲呼一杯
依贈公公其罔憾乎惟公又有言縹臣棄鄉閭邱
壟違三紀中心甘茹荼何忍爲同穴恬然婦與夫
伯子念茲慟我母誠何辜淺土非所安或乃憂沮
如墓祀雖今禮人情寧獨無是用虔告公迎母亦
來居兆域遙相望名山同一墟或無恫先志聊以
慰區區茲行涉江河頻煩易舟輿精誠一死生脩
阻忘艱虞兩事皆義起質俟良不孤仁至斯義盡

禮俗焉能拘寸心求所安古今成斯須至性苟無存豈得爲通儒

謝眺北樓

陵陽之山平地削立一千丈數年之前猶見崔巍傑閣居其上綺疏豁達凌虛空雕甍縹緲出塵埃此閣實在太守衙齋內百里川原皆坐對開簾柏視峰嶙峋撫檻麻姑雲霧疑一卷相看興欲飛萬井人烟遶翠微嘯傲滄洲成臥理至今人說謝元暉元暉政簡精神暇題詩常在高樓下哀響靜聞

獨鶴唳清光遠見迴溪瀉有時杖屨恣幽尋閒採
好景入青林埜浦仙巖周所歷五馬雙旌盡日吟
謝公去後青蓮至敬亭雲鳥同高寄開元麗句紹
南齊物外逍遙風未墜作賦登臺繼者誰都官疊
嶂咏新詩自驚三紀去鄉邑林壑初知郡府奇更
有肝江來作守譚經勸學光并後高閣何須畫掩
扉訟人感泣歸淳厚藹藹春風覆六郊經營百廢
下忘勞版築涇川千雉壯巋竦西津十仞橋士戴
良師民恃母爲政風流世希有紀遊徧勒磨崖字

躋堂笑進邨農酒，兩水雙橋秋復春。
城郭亭臺幾度新，千年勝地留芳躡。
踵武嗣徽屬後人，君不見敬亭山囷囷。
輪輪之氣直接陵陽三峰起，孫陽欲過驂騑喜。
一朝題咏滿江城，重尋舊碣烟霞裏。
二三賢大夫，庀材艱慮始。懷古正情殷，幸得承風旨。
竚看飛樓似昔時，百尺丹梯雲外倚。

贈吳舫翁

先聖旣往微言絕，諸儒祖述存餘蘊。
羊精深平實推濂洛千秋洙泗道，重光無端沿派岐。
朱陸立說紛

紛徒往復夷考鵝湖講席初兩賢所學原非殊爾
後學者成門戶轉令二氏笑吾徒君不見禪那律
教分宗旨曹洞臨濟亦如此又不見丹家內外書
汗牛北真南祖疏源流師承往往多睽異未肯操
戈向同類如何吾道喜相攻詆斥儒先稱道義
翁先生來敬亭黃冠野服譚遺經舌鋒如濤文似
瀑勇肩名教爲干城幾年結廬棲泰岱致齋虔往
先師拜一杖孤行軍壘中闕里上丁逢釋菜作書
千言告聖賢至誠香爇高爐內由來名理盛西江

多君特立無依傍
媿我行年過五十
支離困頓空
芒芒讀書妄欲闕
元始日用躬行無
一是安得如
君汗漫遊遠離熱境
從山水習氣庶幾能
滌除悠然靜會吾
心理

曾孫鉞 校字